

PUO YA BOPHATLALATSI BA DITABA MABAPI LE KGAPO E MOLAONG YA THEPA YA ROY MULEYA

Tshwane, 29 Mphalane 2025 — Ditshebeletso tsa Lekgetho tsa Afrika Borwa (SARS) di ananela kahlolo e dihlweng ka la 29 Mphalane 2025 ke Lekgotla le Phahameng la Afrika Borwa, Gauteng Leboya (nyeweng ya nomoro ya 48495/2020). Qeto ena e tlile ho latela kopo e tlisitsweng ke SARS hore ho be le kgapo e molaong ya thepa ya Mong. Roy Muleya.

Mong. Muleya o ile a fumanwa e le e mong ya neng a kgatha tema e ka sehloohong sekemeng se neng se neng se na le seabo thomelohareng ya kwae ka ditheo tse neng di se na maqhama a hlakileng le bahlahisi ba ngodisitsweng ba disakarete.

Mong Muleya o ile a behwa molato wa sena ho latela tsebiso ya karolo ya 103 ya dintlha tsa Molao wa Bolaodi ba Meedi le Dihlahiswa tsa Naha mabapi le khampani e neng e na le sekoloto sa tjhelete e kana ka ±R155 million. Ke molaodinosi wa khampani.

SARS e ile ya etsa kopo ya kgapo e molaong ya thepa kgahlano le Mong. Muleya ho latela dintlha tsa karolo ya 177 ya Molao wa Taolo ya Lekgetho ka Loetse 2021.

Kopo ena e ile ya dulelwa ka la 24 Motsheanong 2023, mme kahlolo ya ntshuwa ka la 29 Mphalane 2025, mme yona e dumellana le kgapo e molaong ya thepa ya Mong. Muleya.

Katleho ena e supa maikemisetso a mawala ao SARS e a sebedisang ho sebetsana ka matla le bao ba ikgethetseng ho se sebetse ho bapa le molao. Kamehla SARS e sebetsa ka thata ho fana ka tlhakisetsa le nnetefaletsa ho balefalekgetho hore ba tsebe boitlamo ba bona ba molao. Sena se tsamaisana le ho fumaneha ha dikanale tsa dijithale, tse etsang hore boikobelo ba bona bo be bonolo. Moo baefalekgetho ba etsang ka boomo ho se natse boitlamo ba bona ka ho etsa tse ka thoko ho molao, SARS e tla ba thatafalletsa le ho etsa hore ditjeo e be tse hodimo. Matsapa ana ohle a etswa ho kgothaletsa tlwaelo ya boikobelo ba tefo ya lekgetho ka boithaopo. Sena

se etswa ho nnetefatsa hore balefalekgetho ba ikobela boitlamo ba bona ba lekgetho ka tsela e lekalekanang, ntle le ho jarisa balefalekgetho ba ikobelang morwalo ka lebaka la mojaro o sa lekaneng wa ho lefa lekgetho.

Ha a ne a ntsha maikutlo ka taba ena, Khomishenara ya SARS Edward Kieswetter o itse:

“SARS e ka se fele matla ho latella ka tsela ya molao bohle ba iphaposang molao le ba lekang ho o balehela. Afrika Borwa e hlokometse ho ata ha kwae le disakarete tse seng molaong, mme diketso tsa Mong. Muleya di etsa hore taba ena e be mpe le ho feta. Ka ho tlisa disakarete ka tsela e seng molaong ka hara naha ho beha bophelo bo botle ba ditsubi kotsing mme ho nyatsa mokotla wa naha ka ho o hlokisa dikgafa tsa dihlahiswa tsa naha. SARS e tla tswela pele ho sebetsa ka molao le ho tiisa letsoho kgahlano le bao ba etsang ka boomo ho qoba kapa hona ho iphapanya le boikarabelo ba bona ba lekgetho. Molaetsa oo re batlang ho o fetisa ke hore ho sa natswe hore ho nka nako e kae, SARS e keke ya tlohela boikarabelo ba yona ba ho phethahatsa molao. Re tla phetha sena ka boikarabelo le ka tsela e sa inkeleng diqeto, letswalo kapa leeme. Ka hobane bohle re a lekana pela molao”.

Khomishenara o boetse a ipiletsa ho ditsubi hore “Le ha e le qeto ya hao hore o tsube, ke batla ho ipiletsa ho wena hore o se wele lerabeng la ho tshehetsa tlhahiso le thekiso e seng molaong ya dihlwahiswa tsa kwae. Ka ho etsa jwalo, o tla be o tshehetsa maqulwana a dinokwane o sa hlokomele” o phethetse ka ho rialo.

Ho fumana lesedi le fetang lena, ka kopo ikopanye le SARSMedia@sars.gov.za

KE PHETHO